

ՄԱՅԻՍԵԱՆ ՇԱՐԺՈՒՄՆԵՐԸ

Այն ժամանակ, երբ Վրաստանում, Ազրբեջանում, Հիւսիսային Կովկասում և ամենուրեք հայ բոլշևիկները ենթարկւում էին անողոք հալածանքի, Հայաստանի կառավարութիւնը նրանց տեց հնարաւորութիւն ապրելու և աշխատելու Հայաստանում: Հայ բոլշևիկ գործիչներից շատերը՝ Ս. Կասեան, Ա. Մուսեան, Ս. Պանոյեան, Գ. Շահվերդեան, Մ. Սահակեան, Ե. Երզնկեան, Աւիս Նուրիջանեան և ուրիշներ իրենց կեանքը փրկեցին Հայաստանի կառավարութեան շնորհիւ: Նրանք Հայաստանում վարում էին գանազան պաշտօններ պետական ու հասարակական հիմնարկութիւնների մէջ — դպրոցներում, կօօպերատիւներում, նախարարութիւնների, պետական վերահսկողութեան, ինքնավարութիւնների մէջ:

Ընդունւելով Հայաստանի սահմանների մէջ՝ կառավարութիւնը մի պայման էր դրել հայ կոմունիստներին — հակապետական աշխատանք չկատարել: Եւ նրանք ամենքը ազնիւ խօսք էին տւել յարգելու այդ պայմանը: Նրանցից ոմանք իրենք հէնց անմտութիւն էին համարում բոլշևիկեան գործօն աշխատանքը Հայաստանում: Եւ քանի պատերազմական գործերը Պորհրդային Ռուսաստանում յաջող չէին, ընդհանուր առմամբ, պահւում էր տւած խօսքը: Ծիշտ է, պատահում էին մասնակի խախտումներ, ինչպէս «Սպարտակեանները» թուրքիկը Բէոյիւք-Վէդիի կռիւների ժամանակ, բայց կառավարութիւնը ներողամիտ աչքով էր նայում:

Սակայն, երբ կարմիր զօրքերը սկսեցին մօտենալ Կովկասին, Հայաստանում հիւրընկալւած բոլշևիկներն էլ չդիմացան և անցան հակապետական գաղտնի գործունէութեան: Նրանք պրոպագանդ էին մղում զօրքի և բանւորութեան մէջ. բաց էին թողնում գաղտնի թուրքիկներ ու թերթեր: Իրենց կողմը քաշելով Պորհրդարանի անկուսակցական պատգամաւոր Արտաշէս Մեղքոնեանին, նրա միջոցով, հրատարակում էին «Գիւլագիական Չայն» թերթը, որ անհաշտ պայքար էր մղում տիրող ռեժիմի դէմ և, առանց ծածկելու, անում էր խորհրդային իշխանութեան գովքը:

Ա. Մուսեանը պատմում է, որ 1919—20 թւականներին բոլշևիկեան եռանդուն գործունէութիւն կար Հայաստանում: Գաղտնի բջիջներ էին կազմւում, գրականութիւն էր տարածւում, ժողովներ էին գումարւում, քարոզչութիւն էր արւում զօրքի և բանւորութեան մէջ: